

Na osnovu člana 11. Zakona o javno-privatnom partnerstvu ("Službene novine ZDK", broj: 6/16) i člana 21. tačka 5. Statuta Grada Zenica ("Službene novine Grada Zenica", broj: 05/15), Gradsko vijeće Zenica na svojoj ____ sjednici, održanoj _____ 2025. godine, donosi:

ODLUKU

o usvajanju godišnjeg plana
potencijalnih projekata javno-privatnog partnerstva za 2025. godinu

I

Gradsko vijeće Zenica je na svojoj 37. sjednici održanoj 06.10.2023. godine donijelo Odluku o usvajanju liste potencijalnih projekata broj 01-45-21265/23 (srednjoročni plan potencijalnih projekata) javno-privatnog partnerstva za period 2023. - 2025. godine.

II

Usvaja se godišnji plan potencijalnih projekata javno-privatnog partnerstva za 2025. godinu, a na osnovu liste potencijalnih projekata (srednjoročni plan potencijalnih projekata) javno-privatnog partnerstva za period 2023. - 2025. godine.

III

Sastavni dio Odluke je kratki opis svakog pojedinačnog projekta sa liste potencijalnih projekata javno-privatnog partnerstva za 2025. godinu u kojem je opisana svrha i cilj projekta, opis postojećeg i očekivanog stanja u oblasti pružanja javnih usluga koje su predmet svakog pojedinačnog projekta.

IV

Godišnji plan potencijalnih projekata javno-privatnog partnerstva za 2025. godinu će biti dostavljen Ministarstvu za privredu Zeničko-dobojskog kantona, te objavljen na web stranici Grada Zenica i u „Službenim novinama“ Grada Zenica.

V

U budžetu Grada Zenica za 2025. godinu je planiran iznos od 50.000 KM za izradu projektne tehničke dokumentacije (idejna rješenja/projekti) i studija izvodljivosti (opravdanosti) za realizaciju prioriternih projekata JPP-a, koji su identificirani u planu potencijalnih projekata javno-privatnog partnerstva za 2025. godinu.

VI

Ova odluka stupa na snagu danom donošenja.

**PREDSJEDAVAJUĆA
GRADSKOG VIJEĆA ZENICA**

Snježana Vrhovac

Broj:
Datum:

O b r a z l o ž e n j e

Pravni osnov

Pravni osnov za donošenje ove Odluke sadržan je u članu 11. Zakona o javno-privatnom partnerstvu ("Službene novine ZDK", broj: 6/16), a nadležnost Gradskog vijeća utvrđena je u odredbama člana 21. tačka 5. Statuta Grada Zenica ("Službene novine Grada Zenica", broj: 05/15).

Razlozi za donošenje

Javno-privatno partnerstvo je dugoročan ugovoreni odnos između javnog i privatnog partnera sa ciljem pružanja javnih usluga iz nadležnosti javnog partnerstva korištenjem upravljačkih, tehničkih, finansijskih i inovativnih sposobnosti privatnog partnera, kao i razmjena umijeća i znanja između javnog i privatnog partnera, u skladu sa odredbama Zakona o JPP-u.

Postupak dodjele ugovora JPP sastoji se od slijedećih faza:

- a/ Identifikacije projekata JPP-a
- b/ Priprema prijedloga projekata JPP-a
- c/ Odabir privatnog partnera
- d/ Ugovaranje JPP-a

Identifikacija projekata vrši se izradom trogodišnjih i godišnjih planova potencijalnih projekata JPP.

Gradsko vijeće Zenica je na svojoj 37. sjednici održanoj 06.10.2023. godine donijelo Odluku o usvajanju liste potencijalnih projekata (srednjoročni plan potencijalnih projekata) javno-privatnog partnerstva za period 2023. - 2025. godine, broj 01-45-21265/23.

Obzirom da je obaveza da se svake godine, uporedo sa donošenjem budžeta, usvaja i godišnji plan potencijalnih projekata javno-privatnog partnerstva, pripremljena je Lista potencijalnih projekata javno-privatnog partnerstva za 2025. godinu, a na osnovu liste potencijalnih projekata (srednjoročni plan potencijalnih projekata) javno-privatnog partnerstva za period 2023. - 2025. godine.

Godišnji plan potencijalnih projekata javno-privatnog partnerstva za 2025. godinu je potrebno usvojiti i zbog odluke Gradskog vijeća da se sanacija i stabilizacija stanja u JU Apoteke „Zdravlje“ Zenica, te reorganizacija i finansijska konsolidacija poslovanja Ustanove rješava kroz model javno-privatnog partnerstva, a koji je potrebno provesti u najkraćem roku, u skladu sa procedurama propisanim Zakonom.

Finansijska sredstva

Za provođenje ove Odluke nisu potrebna posebna budžetska sredstva, dok su u sklopu budžeta planirana sredstva za izradu projektno tehničke dokumentacije (idejna rješenja/projekti) i studija izvodljivosti (opravdanosti) za realizaciju prioriternih projekata JPP-a, koji su identificirani u planu potencijalnih projekata javno-privatnog partnerstva za 2025. godinu.